



JABATAN PERKHIDMATAN VETERINAR

LAPORAN PEMANTAUAN MEDIA

27 JANUARI 2025 (ISNIN)

Bongkar Taktik Pindah Lembu Guna Float Kuda

MEDIA	RUANGAN	MUKA SURAT	TARIKH
Kosmo	Negara	14	27 Jan

Bongkar taktik pindah lembu guna *float* kuda

BESUT – Taktik seorang lelaki cuba memindahkan seekor lembu secara haram menggunakan treler kandang atau *float* kuda gagal apabila berjaya dihidu pasukan penguat kuasa Jabatan Perkhidmatan Veterinar (JPV) di Kampung Tok Has di sini kelmarin.

Kenderaan pikap, Mitsubishi Triton membawa *float* mengandungi lembu itu ditahan pada pukul 6.45 pagi.

Pengarah JPV Terengganu, Dr. Anun Man berkata, siasatan awal mendapati lelaki berusia 40-an itu ditahan selepas dilihat memandu kenderaan Mitsubishi Triton yang menarik *float* kuda terbabit dalam keadaan mencurigakan.

Katanya, pemeriksaan dalam *float* itu mendapati ia membawa seekor lembu bukan kuda seperti kebiasaan.

“Kita percaya penggunaan *float* kuda itu adalah modus operandi digunakan mahu memperdaya pihak berkuasa untuk pindahkan lembu ternakan secara haram.


“Ini kebiasaannya *float* itu hanya digunakan untuk mengangkut kuda,” katanya di sini semalam.

Anun berkata, suspek juga gagal mengemukakan dokumen kebenaran memindahkan haiwan ternakan daripada JPV.

Beliau berkata, kes sedang disiasat di bawah Seksyen 36(1) Akta Binatang 1953 yang memperuntukan denda maksimum RM15,000 jika sabit kesalahan.

“Saya memohon agar semua pemain industri dan masyarakat peka dan sentiasa mengikut perundangan sedia ada.

“Ia bertujuan memastikan rebakan penyakit di negeri ini dapat dikurangkan,” katanya.



ANGGOTA penguat kuasa JPV Terengganu sedang memeriksa *float* kuda yang mengandungi seekor lembu disyaki cuba dipindahkan tanpa kebenaran di Kampung Tok Has, Besut semalam.

[VIDEO] Aduan Rakyat: Premis Ayam Sebabkan Kacau Ganggu Lalat Disita

MEDIA	RUANGAN	MUKA SURAT	TARIKH
Buletin TV3	Nasional	Online	27 Jan



KUALA LANGAT: Majlis Perbandaran Kuala Langat (MPKL) menyita sebuah premis perusahaan reban ayam di Kampung Ladang Batu, Tanjong Sepat, di sini yang menjadi punca kacau ganggu lalat.

Premis terbabit juga didapati dibina tanpa mendapat kelulusan kebenaran merancang.

Yang Dipertua MPKL, Mohd Hasry Nor Mohd berkata, operasi dijalankan dengan kerjasama Jabatan Veterinar, Ibu Pejabat Polis

Kuala Langat, Jabatan Kesihatan Negeri, Pejabat Kesihatan Kuala Langat, Pejabat Tanah dan Daerah Kuala Langat serta Jabatan Alam Sekitar Daerah Sepang.

Hasilnya, pemilik premis dikenakan tindakan sembilan notis kesalahan dan 22 notis pemberitahuan.

Katanya, antara kesalahan yang dikenal pasti dan dikenakan notis termasuklah di bawah Seksyen 82(5), Akta 171, Akta Kerajaan Tempatan 1976 (Kacau ganggu lalat), UUK 3 Undang-Undang Kecil

Tred, Perniagaan dan Perindustrian MDKL 2007, atas kesalahan menjalankan aktiviti perniagaan berkaitan (reban ayam) tanpa lesen daripada MPKL.

“Tindakan turut diambil di bawah Seksyen 70 (13)(c), Akta Jalan, Parit dan Bangunan 1974 atas kesalahan mendirikan struktur bangunan (Reban Ayam) tanpa kelulusan MPKL (Menjalankan Aktiviti Ladang Penternakan Ayam Tanpa Lesen).

“Kesalahan lain di bawah Seksyen 19, Akta 172 atas kesalahan mendirikan bangunan tanpa kelulusan kebenaran merancang selepas di dapati tidak mematuhi syarat-syarat yang ditetapkan bagi menjalankan perusahaan ternakan ladang reban ayam.

“Tindakan tegas dengan memasang tali halangan (seal) di pintu masuk terhadap tiga premis berdasarkan Seksyen 101(v) Akta Kerajaan Tempatan 1976 (Akta 171),” ujarnya.

Pemilik premis turut diarah menjalankan aktiviti pembersihan dalam tempoh 21 hari dan sepanjang itu juga pengusaha ternakan tidak dibenarkan membawa masuk bekalan ayam baharu.

Tiga notis arahan di bawah

Seksyen 8 Akta Pemusnahan Serangga Pembawa Penyakit 1975 daripada Pejabat Kesihatan Daerah turut dikeluarkan.

Sementara itu, Jabatan Perkhidmatan Veterinar Negeri Selangor juga menolak dua daripada tujuh permohonan premis yang berada di sekitar Batu Laut di sini, termasuk premis ini, bagi memperbaharui lesen Penternakan Unggas Sesi 2025.

Pengarahnya, Dr Hassuzana Khalil berkata, ia selepas premis berkenaan gagal mematuhi beberapa syarat permohonan, selain dikesan menjadi antara punca kacau ganggu lalat di sekitar lokasi aduan.-[BULETINTV3](#)

TERIMA KASIH

DISEDIAKAN OLEH:

UNIT KOMUNIKASI KORPORAT
JABATAN PERKHIDMATAN VETERINAR